



Վ. ՀՈՎՀԱՆՆԻՍՅԱՆ

ՄԱՍԻՍՆԵՐԻ ՀԱՅԱՅՔԻ ՏԱԿ*

Ե՞րբ են եղել այսքան բեղուն, այսքան բերրի հողերն հայոց,
Ե՞րբ են ծաղկել այգիները այսքան շռալ ու լիաճող,
Ե՞րբ է այսպես լուսարծակվել հայոց երկնի աստղը սուտակ՝
Զանգուն այսքան ուրախ եղել Մասիսների հայացքի տակ:

Ե՞րբ է այսպես շատրվանել հայոց բախտի արևը բորբ,
Հույզ ու երազ ծիածանվել հայոց հողում դարերով որբ,
Ե՞րբ է, ե՞րբ է եղել այսքան մեր գարունը լուսապսակ՝
Զմեռը մեր՝ ջերմ ու թեթև՝ Մասիսների հայացքի տակ:

Ե՞րբ է տեսել հայն իր կյանքում այսօրվա պես մի Հայաստան,
Հեքիաթային ու լուսակերտ Երևանի նման ոստան.
Ու այսպիսի մի նոր սերունդ՝ աշխարհացունց մի նոր բանակ,
Ե՞րբ է աճել, ո՞վ է տեսել Մասիսների հայացքի տակ:

Ե՞րբ է եղել հայը այսքան մեծասքանչ ու հրաշագործ,
Ե՞րբ է այսպես հեռու թռել աստղերի մեջ միտքը հայոց,
Մեր վերելքի սանդուղքները՝ դեպ երկնքի ծովը անտակ,
Ե՞րբ է եղել այսքան ամուր՝ Մասիսների հայացքի տակ:

Ե՞րբ է եղել հին աշխարհում այսքան շենշող ու շինարար,
Ո՞վ է տեսել հրաշք մի նոր՝ մեծակառույց մի նոր աշխարհ,
Ու երգն հայոց ե՞րբ է հնչել այսքան խնդուն ու անպարփակ,
Այսքան ծաղիկ ե՞րբ է բուսել Մասիսների հայացքի տակ:

Ե՞րբ է եղել այսքան հպոր ժողովուրդը նաիրական,
Ե՞րբ է եղել ազգերի հետ այսքան մոտ ու եղբայրական,
Հազարամյա իր պայքարում աշխարհն հայոց ողբանվազ,
Ե՞րբ է այսքան խաղաղ ապրել Մասիսների հայացքի տակ:

Ե՞րբ է եղել ուղին հայի այսքան շիտակ ու ապահով,
Այսքան ճամբա՝ ե՞րբ է անցել մեր երկնամերձ լեռնաշխարհով,
Դուռն աշխարհի բաց է մեր դեմ ու դռները մեր անխորտակ
Բաց են հավերժ աշխարհի դեմ՝ Մասիսների հայացքի տակ:

1959

* Հաճույքով վերահրատարակում ենք Ս. Էջմիածնի Հոգևոր ճեմարանի ջրջանավարտ և Մայր Աթոռի գրասենյակային աշխատող Վաչագան Հովհաննիսյանի վերջերս Հայպետհրատի կողմից Երևանում լույս ընծայված «Վաղվա համար» բանաստեղծությունների գրքուկից սույն թերթվածը, ի քաջալերություն երիտասարդ բանաստեղծի:—Խմբ.: